

125 Joor RC Schaffhuuse

Vom BRC dr Presidänt
Darf y beglaite, Sappermänt,
an Eyer Jubileeumsfyyr,
Ihr sin ys halt scho lieb und dyyr.
Z'oberst am Hoochrhy simmer do,
wo-n-ihr dien d'Boot ins Wasser loo.
Das schloot bi uns scho diefi Wunde.
Als Basler simmer gaaanz wyt unde.

Mir und d'Schaffhuser sin am Rand
vom Räschte vo däm Schwyzerland.
S'verbindet is dr Vatter Rhy,
und unser liebschte Zytverdri-
b's isch s Ruedere als Glammere,
drum hämmer gar nyt z Jammere.

Ihr liebe Munot-Ruederfrind,
es isch e Fraid fir uns, y find,
dass Eyer Jubileeumsfescht
nit numme guet isch, nai, 's isch s' Bescht
was Eych und uns duet widerfaare,
de Ruederer vo Rhy und Aare,
vom Bode- und em Ziirisee.

Me fyyrt mit Eych; was wett me meh?

Syt 125 Joor sin ihr Schaffhuser
maischtens halt Gwinner, aber sälte Looser.

Ganz bsunders blybt als Stigg Kultur
mir im Kopf die Stainerduur.
Me startet frieh mit Hängge, Worgge
Und landet gly zuemene Zmorge,
jo aigedlig e gross Gelag,
es länggti fir e ganze Daag.
Frisch gsterggt fliegt me no Stai am Rhy
E näggscht Gelage git's denn gly.
'S git Schungge, Brootis und so fort,
jo, das isch Ruedere als Sport.
Y ha do viilmool mitgmacht schoo,
y hoff y derf au wider koo.
Am Nomidag, die kaibe Wiffe,
die maischte sinn draa duureggschliffe

Mer derfe-n-Eych hit gratuliere
Und Eyer Stadt-door-Spruch zitiere:
Lappi, due d'Augen uuf haisst 's dert,
y hoff, dass das dr Styymaa gheert!
Und statt dass mir jetz Dolle drille,
diemer unsri Määge fille.

Es läb dr Ruederclub Schaffhuuse!!!
Jetz iss y Znacht und gang go pfuuse.

Und jetz git's no-n-e Päg(ger)li,
Es sin – nadyyrig - Läggerli

Martin Hug BRC 27. August 2022